



7. april 2016

FM2016/43

Naqqiut

Siunnersuut 18. februar 2016-imeersoq taarserpaa.
(Qulequtaa naqqiutitaqarpoq)

Inatsisartut Suleriaasianni § 33 naapertorlugu aalajangiiffigisassatut siunnersuut matumuuna saqqummiuppara:

Ilisimatusarfimmi Tusagassiornermik Bacheloringgorniartut atuartinneqarneritigut oqaatsitigut piginnaasat qaffassarnissaasa salliutinneqarnissaannut Naalakkersuisut iliuseqaqqullugit peqquneqarnissaannut Inatsisartut aalajangiiffigisassaattut siunnersuut. Ataatsimut isigalugu kalaallit oqaasiisa atorneqarnerisa ineriartortinneqarnerisalu nukittorsarneqarnissaannut iliuseqarnissami Ilisimatusarfimmi Tusagassiornermik Bacheloritut ilinniarsimasut oqaatsitigut piginnaasaasa qaffatsinnissaat qulakkeerneqassaaq. Kissaatigineqarpoq suliniut ukiut sisamat qaangiussimaleriarpap nalilersorneqassasoq.

(Inatsisartuni ilaasortaq Mimi Karlsen, Inuit Ataqatigiit)

Tunngavilersuut:

Oqaatsit atorneqanngikkaangamik killilimilluunniit atorneqaraangamik ineriartornissaagaluat akimmisinneqartarpoq. Kalaallit oqaasiisa pisortat susassaqarfiini, soorlu ilinniagaqarfinni, allaffissorfinni kiisalu tusagassiutini atorneqarnerat ineriartortinneqarnerallu qulakkiingik-kutsigu tamanna annilaangatigisinnaavarput. Siullertut meeqqat qassinilluunniit ukioqarpata oqaatsimikkut inerikkiartorfissaannik pitsaasunik neqeroorfiginissaat qulakkeertariaqarparput, meeraaqqerivinni aamma meeqqat atuarfianni.

Taamaamat pingaartorujussuuvuq oqaatsinik piginnaasaqarneq meeqqat atuarfianniit isumannaareerneqartarnissaat.

Susassaqarfiit ilaanni kalaallit oqaasii ineriartortinneqarnissaminnut naammattumik atorneqarneq ajorput taamatullu innuttaasut kalaallisut oqaasillit naleqquttumik paasissutissinneqarsinnaasaratik. Taakkuupput kalaallit tusagassiutaanni nutaarsiassa-qartitsiviit. Nutaarsiassa-qartitsinermi innuttaasut nunatsinni avataanilu pisunik paasissutissinnissaat siunertaavoq, tassa sunulluunniit namminneq isummorsinnaanerannut periarfissillugit. Kalaallit nutaarsiassa-qartitsiviini oqaatsit atorneqaqqaartut tassaagajuttarput danskit oqaasii, taakkualu kalaallisut nutserneqartarput. Kisiannili nutsikkat kukkuneqarneri imaluunniit nutsernerlugaaneri pissutigalugit oqaatiginiakkat ersernerlussinnaasarput paasiuminaassinnaasarlutillu. Qallunaatut allaqqaarneqartarput, qallunaatut eqqarsaatigi-neqarlutik, aatsaallu kingorna kalaallisut oqaatigineqartarlutik. Taamaanneranilu kalaallit naammattumik qallunaatoorsinnaanngitsut demokratiskimik pisussaaffeqarnermikkut piginnaatitaaffeqarnermikkullu eqqorneqartarput. Taamaattumik nutaarsiassa-qartitsiviit kalaallisut eqqortumik paasinartumillu atuinissaat taamatullu oqaatsinik ineriartortitsinnissaat pingaaruteqarpoq.

Kalaallisut nutaarsiassa-qartitsinermi kalaallisut oqaatsit atorneqarnerisa nukittorsarne-qarnissaanni nutaarsiassalerisut, tusagassiortut, oqaatsimikkut nukittorsarneqarnissaat pingaaruteqarpoq. Tusagassiortunngorniartarfimmi ilinniarnissamat piumasaqaatitigut sukaterinikkut kalaallillu oqaasiisigut nukittorsaanikkut kalaallit tusagassiutaanni oqaatsitta atorluarneqarnissaat ineriartortinneqarnissaallu aqutissiuussinnaavagut. Tusagassiortun-ngorniat oqaatsitigut piginnaanngorsarnerisigut nutaarsiassalerinermi kalaallit oqaasiisa atorneqarnerat nukittuunngortissavarput. Kalaallisut nutaarsiassanik ingerlateqqiineq oqaatsitsinnik ineriartortitsiviusoq kalaallisullu oqaasilinnut paasinartumik paasissutissiiviusoq pilersissavarput.

Taamatut nunap pisortatigoortumik oqaasiisa amerlanerillu atugaasa nutserinerlunnikkut kukkusumillu atuinikkut aserorsariartornerat pinngitsoortissagutsigu kalaallisut ilinniartitsineq salliutittariaqarparput. Kalaallit oqaasiisa kukkuneqanngitsumik atorneqarnissaat ataqpineqartissagutsigu ilinniartuutissanut piumasaqaatit sukatertariaqarpagut.

Taamaattumik **Inuiaqatigiilerinermik, Aningaasaqarnermik**

Tusagassiornermillu Ilisimatusarfimmi atuartinneqarnerminni oqaatsitigut piginnaasat qaffassarnissaasa salliutinneqarnissaannut Naalakkersuisut iliuuseqaaqqullugit peqquneqarnissaannut Inatsisartut aalajangiiffigisassaattut siunnersuuteqarpunga. Ataatsimut isigalugu kalaallit oqaasiisa atorneqarnerisa ineriartortinneqarnerisalu nukittorsarneqarnissaannut iliuuseqarnissami **Inuiaqatigiilerinermik, Aningaasaqarnermik** **Tusagassiornermillu Ilisimatusarfimmi** ilinniarsimasut oqaatsitigut piginnaasaasa qaffatsinnissaat qulakkeerneqassaaq taamaasiornikkut inuiaqatigiinnut ajunngitsumik kinguneqarnissa naatsorsuutigineqarsinnaammat.

Suliniutip kingunissai kissaatigineqartut anguneqarsimanersut qulakkeerniarlugit, ukiut sisamat qaangiunnerini suliniut nalilersorneqassaaq. Taamaasilluni periarfissaassalluni misilittakkanik pitsanngorsaaneramik assigisaannilluunniit suliniut aaqqiivigineqarnissaa.

Pisortanut aningaasatigut allaffissornikkullu kingunerisassat

Aningaasartuutissat AC-p ukiumi ataatsimi sulineranit nalitunerussanngitsut naatsorsuutigineqarpoq. Nalilersuineq naatsorsuutigineqarpoq ukiumi affarmi AC'p sulineranik naleqarnissaa.

Namminersorluni inuussutissarsiuqarnermut aningaasatigut allaffissornikkullu kingunerisassat

Soqanngilaq

Innuttaasunut aningaasatigut allaffissornikkullu kingunerisassat

Soqanngilaq